



partii naleraq

UPA 2017/104-01

04.05.2017

Angajoqqaarsiat atugaasa pitsanngorsaavigineqarnissaat aningaasatigullu paaqqinninnerminni tigusartagaasa qaffaavigineqarnissaat, taamatuttaaq nerisaqarnermut, atisassarsiutissat, kiisalu kaasarfimmiorisartakkanut aningaasartuutaasartut ullutsinnut naapertuuttunngorlugit naleqqussarneqarnissaannik Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Laura Táunajik, Siumut)

Angajoqqaarsiat atugaasa pitsanngorsaavigineqarnissaat aningaasatigullu paaqqinninnerminni tigusartagaasa qaffaavigineqarnissaat, taamatuttaaq nerisaqarnermut, atisassarsiutissat, kiisalu kaasarfimmiorisartakkanut aningaasartuutaasartut ullutsinnut naapertuuttunngorlugit naleqqussarneqarnissaat pillugit Inatsisartunut ilaasortap Laura Táunajik, Siumumeersup aalijangiiffigisassaattut siunnersuutaa Partii Naleraq sinnerlugu imannak oqaaseqarfigissuarput:

Siullermik Laura Táunajik qujanarujussuaq siunnersuummut soqutiginaratumut pingaaruteqartorujussuarmullu.

Tamanit ilisimaneqarpoq meeqqanut inuusuttunullu tunngassuteqartut pillugit annertuumik pisariaqartumillu iliuuseqartoqarnissaa pisariaqartinneqartoq. Aamma tamanna pillugu MIO-p nalunaarusiaarisartigaasigut takuneqarsinnaavoq, minnerunnmgitsumillu meeqqanut inuusuttunullu suliassa qarfimmi suliassat amerlassusaat pillugu nassuiaammi ukioq manna saqqummiunneqartumi.

Tassanimi nassuiaammi ilaatigu takuneqarsinnaapput nunatsinni meeqqat 24 procentimiit 40 procent-i angullugu isumaginninnikkut suliassa qarfiusut. Aamma tassani takuneqarsinnaavoq inunnik isumaginninnermi sulisut ataasiakkaarlutik suliassanik agguaqatigiisillugu suliassanik 84-inik suliaqartartut.

Taamaamat taakkunuunaannartigulluunniit takuneqarsinnaavoq meeqqat pisariaqartitsisut inunnik isumaginninnikkut pisariaqartitsinerat qanoq annertutigisoq.

Aamma tamanit ilisimaneqareerpoq kommunini inunnik isumaginninnikkut sullissinnermi sulisussanik ilinniarsimasunik amingaateqartoqartoq, tassami assersuutigalugu Qaasuitsup kommuniani inunnunik isumaginninnerup iluani atorfiit 55-it inuttassaqaartinneqanngitsut ukioq tusagassiuutitigut nalunaarutigineqarpoq.

Aamma meeqqanut inuusuttunullu suliasaqaarfimmi suliasat amerlassusaat pillugu nassuiaammi ukioq manna saqqummiunneqartumi ilaatigut imannak allaaqasoqarpoq:

“Suliasanik suliarinnittartunit ataasitakkaanit suliasat amerlassusaat 35-it suliarineqarpata, meeqqat inuusuttullu akornanni suliasat 4.634-iusut suliasanik suliarinnittartunik 132-inik pisariaqartitsoqassaaq. Nalunaarsuiffik 1-imi takuneqarsinnaavoq, massakkorpiaq nuna tamakkerlugu meeqqanut inuusuttunulu suliasaqaarfinni suliasanik suliarinnittartut 55-isut. Taamaattumik suliasanik suliarinnittartut 77-it pisariaqassapput suliasat 35-it suliasanik suliarinnittartumik ataatsimit appartinneqassappata. 77-inik suliasanik suliarinnittartunik atorfinitsitsinissap kingunerissavaa ukiumoortumik 27-30 mio. kr. aningaasartuunik qaffaaneq”.

Taakkua saniatigut maannamut nalunngereerparput septemberimut 2014-imut kisitsisit § 37-ikkut Naalakkersuisuniit paasissutississiisutigineqartut naapertorlugit taamanikkumut meeqqat 62-it angerlarsimaffiup avataanut inissinneqarsimasut, taakkununngalu aningaasartuutit ukiumut 235 mio kr-it missaani annertussuseqartut.

Taamaattumik takuneqarsinnaavoq nassuerutigigalugulu suliasaqaarfik kommunit kisimiillutik naammassisinnaanngikkaat.

Ullumikkut ajornanngippallaarujussuaqaaq meerarpassuit angerlarsimaffiup avataanut inissiinnarneqartarnerat. Eqqaamaneqartariaqarpoq meeraq pisuussuteqanngitsoq, pillakkatullusoq ilillugu angerlarsimaffimmiik aamma avatangiisinit sungiusimasaminiit qimangutsinneqartarmat. Tamatuma qularnanngilluinnartumik kingunerisarpaa; meeqqap inuunermini innarlerujussuarneqarnera, inuunermi sinnerani puujunngisaannangassaa.

Taamaammat isumaqarpugut meeqqat angerlarsimaffiup avataanut inissinneqartarnerat sapinngisamik pinngitsoortinneqartariaqartoq, tassami meeqqap ataatsip angerlarsimaffiup avataanut inissinneqarneranut pisortat qaammammut 80.000 kr-iniik 150.000 kr-it pallillugit

aningaasartuuteqarfigisarpaat, illua-tungaatigulli angajoqqaarsiat akeqanngingajattumik paarsitinneqartarlutik.

Isumaqarpungut pissutsit taamaannerat illua-tungaanut saatinneqartariaqartut.

Angajoqqaanut angerlarsimaffimmi ajornartorsiutilinnut “Inuunerup ilinniarfianik”

inatsisilerinermik ilinniarsimasunik, inunnik isumaginninnermut tunngasunut siunnersortinik il.il. sulisoqartumik, siunnersuineramik, pikkorissartitsinernik il.il. ingerlatsisinnaasunik pilersitsisariaqarpugut.

Angajoqqaat pisussaaffiinik akisussaaffiinillu paatsoorneqarsinnaanngitsunik qaammarsaavigineqartariaqarput.

Angajooqqaarsiat pikkorissartinneqartuarlutik tamakkiinerusumik akissarsiaqartinneqarlutik atorluarneqartariaqarput.

Siuliani oqaatigereerparput, meeqqanik angerlarsimaffiup avataanut inissiisarneq sapinngisamik pinaveersaartinneqartariaqartoq. Soorunami tassani angajoqqaat meeqqaminnut asanninnerat, meeqqallu angajoqqaaminut asanninnerat asuliinnaanngitsoq nukittorsarneqarnissaa pingaaruteqartorujussuaq isumaqarpungut.

Taamaammat aamma meerarpassuit maannakkut angerlarsimaffiup avataanut inissinneqarsimasut nakkutigineqarnerat naliliiffigineqartarnerallu pitsanngorsarneqartariaqarpoq.

Meeqqat angerlarsimaffiup avataanut inissinneqartartut aamma piaarnerusumik angajoqqaaminut angerlartinneqarnissaat nalilersorluarlugulu sulissutigineqartariaqarpoq.

Tupigusuutigineqarsinnaanngilaq ilaqutariinnut inissiiiviusussanut akuerineqartarnissamut piunasaqaatinik sukaterisoqassappat, tassami Meeqqat illersuisuata nakkutilliiartortarnermini paasisimasaasa ilagimmassuk meeqqat inuusuttullu sumiginnagaasimasut atonerlugaanissamut illersorneqanngitsut ilimagisamiit amerlanerujussuusut aammalu Naalakkersuisut akissuteqarnerminni oqaatigaat meeqqat ulloq unnuarlu angerlarsimaffinnut inissinneqartariaqartartut massakkut pisariaqartinneqartunit amerlanerujussuusut.

Allatut ajornaqaaq angajoqqaat angerlarsimaffinni ajornartorsiuteqarfiusuni angajoqqaat pisussaaffiinik akisussaaffiinillu paatsoorneqarsinnaanngitsunik qaammarsaavigineqartariaqarput.

Meeqqat ajornartorsiortitaappata angajoqqaat ikiorserneqartariaqarput, angajoqqaanut pisussaaffiliinerit piumasaqaatillu ersarissut atorlugit. Pisariaqarpallu ilaqutariit tamakkerlugit katsorsarneqarnissaat isumaqatigiissusiornikkut suliaq aallartinneqartariaqarpoq, angerlarsimaffiup meeqqamut nuannersunngorlugu najoruminartunngortinnissaa angutserlugu.

Tamakku soorunami tamarmik akeqassapput, kisianni ullumikkut meeqqamut ataatsimut angerlarsimaffiup avataanut ulloq unnuarlu inissiisarfinni inissiisarnerni aningaasartuutit qiviarutsigit, tassa meeqqamut ataatsimut qaammammut 80.000 kr-iniik 150.000 kr-init pallillugit aningaasartuutaareersut atorlugit meeqqanut inuusuttunullu suliaqarfimmi siumaginninnerup tungaatigut periusissami malunnaatilimmik allannguinnikkut ingerlanneqarsinnaasut isumaqarpugut.

Aamma aningaasat taama amerlatigisut atorlugit ulloq unnuarlu paaqqinnittarfiit ilaanni, meeraq angerlanngitsoorpat imaluunniit arlaatigut ajornartorsiuteqarpat, piaarnerpaamik ikiorserneqarnissaa anguniarlugu iliuuseqartoqartarnissaanik piumasaqaatinik ersarisaasoqarnissaa piumasaqaatigineqartariaqartoq isumaqarpugut. Tassami assersuutigalugu akuersarneqarsinnaangilaq meeraq inuusuttuararlunniit ulloq unnuarlu angerlarsimaffimmiik qimaappat qimaguppallunniit sulisunit qanoq iliuuseqarfigineqarsinnaasarsimannginnera ?

Taamannaannaangallartoq oqaaseqarluta siunnersuut tamakkiisumik taperserlugu suliap aappassaanneerqannginnerani isumaginninnermut peqqissutsimullu ataatsimiititaliami suliarineqarnissaa inassutingaarput.